


247



Case

F

39

.326

1615 co

ADVIS DONNE

AV ROY EN SON

Conseil, par Monseigneur le Prince.

*Sur l'Article du Tiers Estat, contradictions du Clerge
& Arrest du Parlement, le quatriesme de
Januier, 1615.*

SIRE.

l'estime que l'affaire qui se presente est vne des plus importantes qui depuis cent ans se soit agitée en vostre Conseil, digne de vostre presence: Il s'agist de deux points de tres grande consequence: l'un regardel'honneur deu à Dieu, affermisement de l'Eglise Catholique, Apostolique, & Romaine: & l'autre, la seureté & conseruation de vos Estats, certes, Sire vostre Maiesté se peut dire à bon droit le plus grand Roy du monde, qui ne releue sa Couronne que de Dieu seul

auquel tant plus vous estes puissant,
 tant plus aussi estes vous soub-mis: ce
 grand Dieu, Roy des Roys, a voulu
 pour le rachap de nos pechez que son
 fils se fist homme, ce fils nous gui-
 dant de presence visible, nous a laissé
 vn chef visible en son Eglise Saint
 Pierre, duquel le Pape tient chaire &
 legitime succession, estant neant-
 moins chef de l'Eglise, Iesus Christ.
 Le Pape est donc Pasteur & le Pre-
 mier souuerain Pontife des Brebis
 de Iesus-Christ, & vostre Maiesté n'e-
 stant que brebis, comme la moindre
 vous ne deuez doubter que ne soyez
 soub-mis à ceste puissante spirituel-
 le, & pour vous acquerir salut, &
 pour vous retrancher & excommu-
 nier des membres de l'Eglise, si vos
 fautes & pechez en donnent subiect.
 Ceste excommunication pour iuste
 cause liure vostre ame a Sathan, vous
 exclut de la communion de l'Eglise,

del'vſage des Sacremens, meſme de l'entrée d'icelle. Mais en ce qui touche voſtre temporel, ſubiection de vos ſubiects, obeïſſance qui vous eſt naturellement deuë, & ſacrè reſpect qu'il faut rendre à la conſeruation de la vie de l'Oing du Seigneur, la puissance ſpirituelle eſt de nul pouuoir. Que quelque vous ſoyez, heretique ou infidelle, on ne vous doiue obeyr en ce qui n'eſt que choſe purement temporelle. Qu'on ne vous doiue vos tributs, ce ſeroit ne pas ſuiure les preceptes de Ieſus-Chriſt, qui recognoiſt Pilate pour Iuge, qui commande de payer le Tribut à Ceſar, & ſainct Paul y fait venir ſa cauſe par appel, & Ieſus-Chriſt & ce grand Apoſtre recourent au temporel aux iugemēs & arreſts des Princes Payens, Ceux qui ſont ennemis de la puissance des Roys, ſouſtenans les contraires aduis, qui ailleurs qu'en France ne ſe pour-

roient dire problematiques, n'ont iamais esté si enragez que de dire qu'il fallust tuer les Roys, au contraire, de-
testent avec nous ceste pernicieuse as-
sertion, & sera bien facile d'en obte-
nir du Pape la censure. Mais ce n'est
pas la questiō, venons à l'indiuidu, &
nous verrons que vostre sacrée per-
sonne, Sire, peut legitimement en
quelque cas estre tuée de ses subiects
selon leur doctrine, [Vostre Maieité
selon leur dire peche, on l'admon-
ste iusques à la troisiésme fois, elle cō-
tinuë, on l'excommunie, elle ne se re-
pent, on la depose de son Royaume,
on absout vos subiects de la fidelité
qui vous est deuë, Lors tandis que
Louys XIII, estoit Roy, il n'estoit pas
permis de le tuer, mais estant deuenu
de Roy non Roy, vn autre legitime
prend sa place, lors continuant con-
tre l'autorité spirituelle du Pape &
temporelle du nouveau Roy esleu, à

5
se dire Roy c'est vn vray vsurpateur,
criminel de leze Majesté diuine &
humaine, & cōme tel prosript, per-
mis à tous de le tuer.] C'est donc folie
de demander la censure contre ceux
qui attentent contre les Roys, elle est
aisée à obtenir, mais il la faut auoir
entiere, & seuerre contre ceste perni-
cieuse doctrine, qui de filet en aiguil-
le nous maine à vsurpatiōs, rebelliōs,
& meurtres contre nos souuerains, de
plus, mesme du cōsentemēt des Papes,
nous auons en Frâce tenu à iamais ces
maximes. Les ordōnances de S. Louys
nous le monstrent suffisamment, l'hi-
stoire nous remarque, que du temps
de Philippe le Bel, ce Roy s'opposa
vertueusemēt au Pape Boniface, qui
lors ayant fait vn decret, fut depuis
reuocqué par sō successeur au regard
de nos Roys, lors tous les Euesques de
France, hormis deux, soustindrent
courageusement nos maximes, & la

6
Noblesse fit vn trait à iamais memorable, escriuant au Pape, elle manda qu'en tout elle vouloit obeyr au Roy, mais que si le Roy vouloit soubs-mettre au Pape sa puissance temporelle pour les droits de sa Courōne & Successeurs qu'elles y opposeroit, du tēps de Louys XII. nous eusmes besoin de pareille generosité, depuis du temps du Roy Charles IX. en l'année mil cinq cens soixante & vn, Tanquerel Bachelier en Theologie, ayant soustenu ceste damnable doctrine, fut par arrest de la Cour, condamné à faire amende honorable, & plusieurs Docteurs de Sorbōne à demander pardon au Roy, A quoy le Parlement fut lors excité par le Roy, la Royne sa mere, Princes de son Sang, & Commission speciale de ce digne Chancelier de l'Hospital, qui lors employa les Seaulx du Roy à exhorter ses Officiers à faire iustice des assassins

des Roys. Nous deuons attendre la
 mesme prudence de la Royne vostre
 Mere, veu qu'elle a passé tant d'es-
 cueils durant sa Regence, pour vous
 mener au doux port de vostre Maio-
 rité. Depuis la mort de nos deux
 Roys, les Clement, Guygnard, Barrie-
 re, Chastel, & Rauillac, nous donnent
 plus de subiect qu'à aucune nation,
 d'exercer cete fatale doctrine, ce sont
 les subiects, Sire, qui me font admirer
 la sagesse de vostre Parlement, qui
 par le tesmoignage qu'il vous rend de
 sa fidelité, vous oblige à iamais, &
 toute la France, de les estimer fidelles
 courageux, & incorruptibles Magi-
 strats, qui sont les vrais conseruateurs
 des saincts Decrets, & de qui il ne sort
 que des Oracles d'une infaillible ve-
 rité. Magistrats qui vous font réuerer
 puis-que vostre personne seule en
 France est exempte de leur Iurisdic-
 tion. Je ne parle que pour l'intherest

du Roy: car i'espere sa vie durer des
 siecles, celles de M^osieur son frere de
 mesme, & par vne multitude d'enfās,
 nous nous verrons asseurez en vne
 paix perdurable. Neantmoins, Sire,
 puis-qu'en tout temps toutes rudes
 medecines ne sont bonnes, le suis
 d'aduis d'interdire pour la consequē-
 ce du Clergé & Tiers Estat de plus
 disputer ceste questiō, & l'éuoquer à
 vous, leur laissant la liberté aux vns
 & aux autres, de mettre leurs Ar-
 ticles comme ils voudront, & lors
 que vostre Maiesté respondra les
 Cahiers, nous verrons lors par vostre
 prudence nos anciennes maximes
 confirmées par vostre responce, Et
 pource que le Clergé & la Noblesse
 pensent l'Arrest de Parlemēt empes-
 cher leur liberté pour le present, pour
 deciler leurs yeux, le trouue bon d'en
 empescher par deffance la signature,
 prononciation, & publication.

